

臺

省

疏

稿

臺省疏稿序

異日者廬州守謁余而請曰道明
為諸生時遊今大家宰

之門因緣得次公所為臺省疏草
凡若干卷梓之郡庠以傳公雅知
先生敢乞一言序之惟冰早官東
甌嘗綴公末行後又謁公西湖上

間請質公平生經濟大略而不及
詳今幸獲讀是編卒業則始矍然
窺公之大又公舊督漕而余幸續
貂尾實奉公成畫有餘庇焉其何
敢辭竊惟

聖祖肇畫中原以京師建極臨四裔
而撫之較齊形勝譬若常山之蛇

以關中為首據百二建瓴而下山
東淮揚為脊轉輸通津要樞兩都
間二廣為尾薄海南際險絕岿峻
此其大都也諸方類設撫臣於三
鎮尤重至於以一人備更三鎮則
縉紳為稀數非文武具備有足毗
倚者不是授也公由郎署敷歷藩

臬才名忠猷震海內身事

三朝游被

眷篤故始者借公撫關中已又再至
時公則闡謀懾虜增城通利水道
設險漢中虜即效貢而隱然以陝
為天塹所以起天下之首也此撫
淮揚時公則督厲將士便轉輸移

農官撫茲凋殘炳然以遺後者成
規百利所以強天下之脊也海寇
方熾已又晉秩視師兩廣時公則
鯨鯢尸於海狐鼠陳於陸遣將發
卒收叛鋤巢蓋不啻洗而滌之所
以收天下之尾也公所著績其大
者在疏中而其應機即發發而密

不可以語人者又不具於是焉今
天子新政慎簡在庭尤以

冢宰為百僚冠乃

特召公於南司空而寄之銓軸嗟乎
上方幸天下倚老成為治即意有所
指必如公更嘗劇區明於掌上足
供問對又

朝廷所倚三垂公皆敷澤而奏成焉
則人才之選授與道里國俗難易
相為劑品又宜莫如公者

天子深眷而用之重有以也往憶蕭
何收秦圖籍漢得具知天下阨塞
丙吉入相使東曹考案匈奴瑣條
具悉奏對稱旨公疏皆更居天下

兵食最大且重處而中又多急畫
可為世法者至於詞之雅醇悠懷
有陸贄劉向之思焉余以為如公
所疏列當藏之天府為後考證三
鎮制治者質券又非特如一家著
述私言必傳而已也覽者其以是
求之

時萬曆二年歲次甲戌春正月吉
賜進士出身通議大夫總督漕運軍
務巡撫都察院右副都御史臨海
王宗沐頓首書

劉大家宰元翁張老先生奏議序、
士君子立人之朝懷竒傑瑰瑋之節、
其所宣猷覃力者行也陳見劾悃者
言也有可述之行則必有可紀之言
唐虞以降賡歌之風曠邈矣奏記之
形忠臣謀國者先之揆所從來漢始
稱盛賈生治安一書董子天人三策
尚矣他如劉向匡衡輩當元成之世

猶然論說不置其所上災異封事修
性正家等疏不下數什伯言然向之
說弗果行衡猶懷顧忌有所不盡言
者識者不免有遺論焉迨唐而有陸
敬輿之奏議藹然忠愛言與意俱深
得告君之體故後之論思獻納者咸
取資以為歸大象宰元洲張翁名頴
動海內久矣道自束髮為諸生時相

翁所為時義舉子業竊私淑矜式之
甫壯歲通籍行游燕越齊魯間每咨
訪先達芳輟令矩則又稔翁所設施
政事顧弗獲覲只高山之仰徒重自
約結胸臆壬申歲幸備員南臺時翁
適承

命來總憲事得朝夕侍左右砥磨譚述
一日翁出示疏稿若干篇道得受而

讀之輒掩卷作而嘆曰元洲翁真社稷臣哉即立朝大節迺今得以覲記之矣昔宋司馬光進君道三劄自謂平生力學所得盡在是翁之章疏奚啻三劄其力學所得又自淵然深醇然粹以懿也乃其忠義耿介天植其性不可移易居嘗經畫天下事本之神鑒遠而閱歷精是故其所指顧握

筭靡不悉當機宜如矢赴的而符合
節不爽尺寸迨夫操縱運量之妙用
則又不可揣摩而擬度之方翁之初
入仕也服官郎署兩守劇郡踐歷藩
臬晉秩臺省政行卓越殊絕所至焯
有聲績當是時翁所歆論列世故者
豈遂忘之哉顧匪伊言責攸係不歆
越俎言事即有竒安所自表見迨其

開府仗節鉞臨戎而又畀之以理漕
治河所關皆

朝廷軍國重務豈惟翁所能行之即言
責亦屬之矣翁乃殫心竭謨劑量緩
急凡所安內攘外一切時政大體悉
關白而後行之是故其籌邊有疏撫
夷有疏議征勦有疏廣儲峙有疏舉
賢絀不肖有疏至於成功告捷陳乞

謝恩罔不披歷於

君父之前其論事剴而切其建議辯而裁
其陳情懇而力雖其言與事殊而侃
侃讜論百慮一致即其中或有少置
論辯有不容辭口結舌者亦其直節
勁氣使然若其依回兩可則非翁性
所狎也翁每一疏入必舉手仰天祝
曰吾言得無有違者乎默而湛思無

憾而後即安其精白一心上帝臨之
明神鑒之美假令敬輿而在與之比
肩竝足而立上下相伯仲誰復能有
所軒輕於其間者當翁之初出鎮也
自關中徙淮自淮徙兩粵兩粵頻年
來故多難寇盜克斥徵發旁午適茲
土者舉疾首蹙額翁獨處之夷猶憂
然以身擔之決策制勝坐收蕩平

纖毫皆翁力也當事者顧歆攘其功
迨失事鼓鑿則又歸罪於翁翁終不
自白脫然謝柄去無何當宁諒其忠
天子嘉其績尋詔起之不踰年則又

簡任之以掌銓衡宅百揆

聖君賢相知人之鑒固自有在哉道嘗謂
翁如干將莫耶遇盤錯則剗剗有餘
其堅石不渝如百鍊金久而愈莫能

錄也觀其言自可槩見矣翁素博綜
群籍冥搜玄契以文學飾吏治嘗有
詩文集行於世風雅古偉遠追漢魏
其曰奚囊蠹餘者則翁所自名篇云
夫里夫巷士矢口謳吟雕虫小技楊
子雲所謂壯夫不為者曾何涉足作
者之途其間工拙無暇論即工亦什
伯之二二耳此不免覆瓿譏也然而

浸淫者且牛棟矣矧斯集也其所裨
益於理道世風良非淺尠是胡可弗
梓之以廣其傳以貽四方同志之士
哉時廬州守吳君道明請於翁再三
吳君翁守大名時所甄拔門下士也
爰命鋟而刻之刻成吳君徵一言於
道序諸首簡道不自揆謏陋敬識其
雅所傾慕嚮往者如此云

賜進士第文林郎南京河南道監察御史
松陵晚學陳王道頓首拜書

臺省疏稿目錄

卷之一 賀謝等類

恭賀登極疏

奉慰疏

賀冊立東宮疏

謝陞陝西巡撫疏

總督漕運謝恩疏

恭謝頒恩疏

恭謝河工頒恩疏

恭謝 欽賞疏

總督兩廣謝 恩疏

謝 恩疏

恭謝 欽賞疏

再撫陝西謝 恩疏

謝賞疏

南京掌院謝 恩疏

南京工部謝 恩疏

再謝 欽賞疏

乞 恩移贈疏

乞休疏一

乞休疏二

乞休致以謝人言疏

衰病乞休疏

衰病乞休再疏

應詔自陳疏

自陳疏

卷之二 前後關中類

議處邊藩祿糧疏

大虜盤據臨海官軍奮勇斬獲疏

議處財用以定經制疏

舉劾方面官員疏

舉劾有司官員疏

薦舉教職以飭學政疏

舉劾武職官員疏

增修極衝邊垣墩堡報完疏

卷之三 前後關中類

議包執城以重省會復洪堰以興水利疏
邊患稍寧及時大修邊政疏
酌議地方事宜以興治安疏
議裁續添兵將以節邊餉疏
酌議地方事宜以興治安疏
薦舉賢能官員請豁 王親以備擢用疏
酌議地方事宜以興治安疏
悉悃愚疏

卷之四 著選類

中嚴運務疏

議釋高璿宗室疏

議專官以安地方疏

免乞運以恤貧軍疏

暫免帶磚以恤運軍疏

議更運船以便官軍疏

勘報衝損糧船疏

查議卹典疏

議兩浙把總疏

舉劾有司疏

薦舉兵備官員疏

薦舉方面官員疏

薦舉教職疏

舉劾將領疏

舉劾武職疏

卷之五 兩廣類

請調將官東征疏

剿平流賊報捷疏

叅廣東失事疏

請留總兵官再疏

請釋閒宅庶人疏

擒獲賊首疏

會議軍餉征剿古田疏

明職掌以一正體疏

會留廣東錢糧疏

查叅失事將官疏

卷之六 兩廣類

海上擒獲捷音疏

海賊流劫議處防剿疏

鵬剿右江都亮功次疏

截殺山賊功次疏

發回安南夷目疏

查議開設新縣疏

議處剿賊事宜以便調遣疏

請行閩省併力夾剿海賊疏

卷之七 兩廣類

擒剿海洋巨寇大捷疏

議剿倭寇疏

議復梧鎮班軍疏

鵬剿右江淶里等處功次疏

勘議 王府宗室事情疏

參論總兵知府攻訐疏

議處有司官員疏

卷之八 兩廣類

擒斬積惡首賊捷音疏

將領激兵叛殺旋即計滅以安人心疏
官兵奮戰生擒倭王大捷疏

叛賊流毒地方調兵急剿疏

剿滅倭寇并擒叛賊首惡大捷疏

擒斬山海劇賊報功疏

薦舉方面官員疏

舉薦賢能教職官員疏

舉劾有司官員疏

舉劾武職官員疏

臺省疏稿卷之一

賀謝陳乞類

恭賀登極疏

伏以

龍飛啓運欣逢

聖作之期 鴻業丕承快覩 鼎新之命臣民

踴躍普率輝光恭惟

皇上恭儉溫良 聰明睿智 青宮毓德接三

皇五帝之傳 紫極重華紹

聖祖神宗之統 天心克享 履泰登樞 神

罷攸歸 乘乾御世謙撝三讓謳歌朝覲

歸心順效百靈 宗社人神有主建寅從

夏正頒萬年之玉曆適屆初元繼禹惟啟

賢際五百之昌期於斯為盛臣聯班臺省

方領役於南淮薦沐 恩波益馳心於北

闕拱隨星向誠效嵩呼伏願 繼明以照

四方麗日光天共荷維新之化 顯比以

親萬國滄溟紫塞同歸柔遠之仁 萬壽

無疆而金甌鞏固五氣順布而玉燭調和
臣無任瞻仰昇營之至

奉慰疏

隆慶元年正月十二日接到

大行皇帝遺詔欽遵開讀行禮外仰惟

皇帝陛下 大孝根心至情率禮值此終天之

戚豈勝罔極之哀竊惟

大行皇帝本 聖神文武之資垂 光前裕後

之業 功德之茂前古所稀 享國之長

近代未有矧得壽已周乎甲子而繼志有
託於丕承 賓天之靈信無遺域永思之
切似可自寬伏惟少抑 孝情勉承 遺
詔保順天地百神之主丕宏

祖宗列聖之基體

先皇屬望之心慰率士臣民之望臣無任懇切
顛仰之至

恭賀 冊立 東宮疏

聖主乘乾麟趾協重熙之運 元良出震鴻圖

行奕業之光前星騰瑞於微垣銀榜題宮
於仙嶠神人慶溢宇宙欣騰爰稽廟業延
長繩武推乎誦聖上逮禹德無間之子肇
於啓賢商書載以貞之文非徒立愛漢史
傳早建之議惟在得人主器宗桃劫海
徵歌重潤貳體宸極洊雷應位春方陋
彼金玉之詞徒誇釋奠豈若典禮之正快
覩文華恭惟

皇上

至性天成

英謀神受任賢圖治尤屬

意於經筵敬天勤民更致嚴於郊祀 政
先恭儉時敷容保之仁 道擅經綸曲盡
財威之義茲值蝻斯之方茂預貽燕翼之
深謀 蘭殿呈祥慕 文德武功之緒
青宮授冊率 遠祖近宗之規名分定而邦本
不搖人心悅而王業彌固是誠 宗社錫

祉祐啓

皇心乾坤合謀真安景祚播休光於八表洽和
暢於萬靈者也 臣職繫炎荒心懸 丹闕

觀鳳書之誕布遙增雀躍之忱望雞
戟之森嚴莫遂鸞班之造跡遠心通感倍
歡均伏願養以聖功正士端人同為輔
弼學于古訓詩書禮樂用以周旋繼明
照於四方治平有象綿本支於百世德
澤無疆

謝陞陝西巡撫疏

伏念臣草莽寒士委瑣末流幸際聖明
蚤干祿秩郎署兩都垂十載瘼曠無裨奔

走四方二十年漸負尤甚勉循三尺敬畏
四知雖孤宗父歷崎嶇計圖報曾無分寸
自甘退伏何意甄收矧巡撫重臣係一方
之休戚而中丞憲職本羣吏之綱維地即
三秦語形勢素稱雄鎮治分八郡在疆圉
均屬要區豈期再造之餘榮薦奉九
重之簡用茲蓋伏遇

呈上

道參天地

化協唐虞統馭百靈鈞陶

萬彙

肅清政本典憲式儆乎臣民
洞

見物情幽隱莫逃于毫髮以故茅茹盡拔
而葑菲不遺何異金玉斯宣而木石不廢
遂令蹇鈍亦與驅馳 恩寵既邁乎尋常
砥礪敢踈於遲暮適屆秋防之候已嚴固
鎮之行誓竭迂愚勉圖安攘倘涓埃之得
效庶少酬 高厚之恩縱才識有所拘亦
畢殫犬馬之力

總督漕運謝 恩疏

伏念臣用世菲才宦途多蹇閱歷雖久譽

望未孚誤蒙 高厚之恩拔諸冗賤之役
雍秦宣力經年僅自焦勞棘寺詳刑數月
未諧法比遽登憲部獲亞六卿凡皆踰分
之光榮已慙負乘何意方來之申寵有隕
自 天茲蓋伏遇

皇上 秉離照以乘乾隱微畢見 體咸虛而
顯比葑菲兼收遂令腐朽之根芟亦荷陽
和之發育本以得人行政猥慚遺大擇艱
念東南為西北之倉庾而盈縮繫本根之

虛實轉輸既關乎國計兵戎尤急於海
防責任非輕迂愚曷稱璽書恭捧寢食不
遑臣敢不永矢素心益堅晚節值重華
之運快覩惟均感荐晉之殊圖報彌切奉
揚威命期振起乎漕綱覃布
聖慈務安集乎田里淳氛禳於島嶼庶幾浩蕩
無波化強禦為淳良行見太平有象幸酬
夙願少荅鴻休

恭謝 頒恩疏

隆慶元年六月十五日欽奉

勅諭節開特賜侍郎兼都御史張瀚給與誥命
狼山副總兵李如玟紵絲二表裏叅政劉祐
副使徐節俱給誥命叅將顧承勲紵絲
一表裏守備張忠尚董濤周桐狄從夏軍門
中軍李夢孫把總秦泮孫世爵僕大有徐
正達九思周文忠每員紵絲一疋欽此臣
當即同叅政等官劉祐等望闕叩謝并
將原賜李錫等十三員紵絲表裏頒給

各官咸祇領叩謝訖除臣等各應得誥
命類咨吏部請給外伏念臣等服役江淮
均慙尸素恭逢屢泰共荷維新茲當臨
御之初首渥臣鄰之惠旣覃侍從亦及戎
行深惟曠蕩之恩踈迹不遺乎寵異猥
辱恩綸之渙光榮迥邁乎尋常封誥貴
儒紳存歿仰龍光披拂推衣頒武弁被
服皆鴻造裁成凡承大賚之自天深媿
涓埃之未效儻幸致身之有日矣酬

高厚於無忘

恭謝河工

頌恩疏

竊惟國家財賦仰給東南輸運帆檣必
由河道每歲千艘萬石渡江淮以沂黃河
從此浮濟入汶踰滄瀛而達通惠皆藉渟
濇巨浸亦資導引原泉其中設隄岸以束
其奔騰建閘壩以時其啓閉雖濬鑿排澗
運用有賴於人謀而轉徙變遷緩急難調
乎水性邇者徐沛數十里之間寢滯成涸

天之勢漕河故道填塞漸高舟楫不通糧
運遂阻致屢宵旰之慮廣詢論議之同

乃命司空旋議開鑿積日累月糾工集財

幸及功成新渠底定寔仰賴朝廷威德

淪浹感孚是以地道靈通民悅趨事不疾

而速能忘其勞也臣始謀未效後事無裨

敢云稽督憂勤仰荷寵頒金幣出內帑

之鄭重身媿比乎雙南分寶笥之綺紈誠

祇勤於一縷臣敢不服以懷恩寶之傳

世矢心報稱仰贊平成

恭謝 欽賞疏

該兵部覆題為仰仗 天威官兵奮戰飛
報大捷等事節奉

聖旨欽賞廣東當事諸臣近該浙江巡撫衙門
批差承差潘守禎赴京奏事具告禮部將
賞銀二十兩紵絲二表裏領出本年六
月初八日齊捧到臣當即望 闕叩領訖
伏念東粵遠在嶺海素非寧謐之區邇年

數起頑冥滋多軍旅之事彼以曾酋猖亂
方積兵選將造舟制噐出萬全之師何意
倭寇陰連廼投間抵禦聲東出西為一道
之梗非但分我兵力又且作其應援議合
剷除勢難緩縱於時躬冒矢石則將士之
勞多悻惺運籌則撫臣之算勝藉贛兵為
虎羽以鄰鎮銳於同心破城驛之蟻巢由
該道勤於任事辛而擒王滌穢滅賊寧民
寔仰仗我

皇上威稜震警廊廟紆謨在臣僅能奉揚天
威督率調遣而已豈有微勞敢叨恩賚
金頒內局光分寶藏之珍幣出在筭彩絢
天機之錦纓慙頑鈍誤辱陶鎔才乏經綸
終輸機線深惟鄙陋之質祇增郵結之忱
臣敢不葺為世珍服之無數祝皇圖於
鞏固萬方永奠金湯臻聖治於垂裳六
服祇承玉帛

總督兩廣謝恩疏

臣竊自念束髮入仕垂老無功祿秩久糜
艱辛備歷誤蒙拔擢起藩臬而濫厠省臺
出鎮江淮飭兵戎而總司糧運有懷振刷
曾無益於分毫不恤怨尤祇自貽其憂惕
矧慮不周於河患致數有隕於京儲方臨
履如淵水敢覬覦於進取豈期弘造復
冒殊榮惟兩粵僻在遐荒漸摩已舊而頻
年滋多頑梗軍旅煩興所幾望於小康宜
責成於專任偶諧推引遂荷恩俞恭捧

龍章深慙忝負自量盤桓已倦不任驅馳徒
以高厚難忘忍言辭避矢心砥礪努力
涓埃伏願丕震武威山海煙波永息
誕敷文德滂洋膏澤均霑

謝恩疏

隆慶三年三月二十日准兵部咨為遵奉
明旨大舉水陸官兵越境追剿有名巨賊恭報
異常捷音事該本部具題節奉

聖旨兩省夾剿海賊擒斬數多各官効有勞績

張瀚賞銀二十兩一表裏欽此欽遵當據
臣原差承差蕭粵龍齋捧前項 欽賞銀
幣到臣除欽遵祇領望 闕叩首謝 恩
外臣惟信賞必罰

聖王御世之大權宣力膚功人臣奉職之公義
即使無前偉績在 天功亦不可貪矧方
一挫窮光於愚衷猶未少愜憫勞瘁以
寵錫驀荷 弘慈省遲鈍之積愆何勝跼踖猥
以凡庸劇役適當軍旅煩興致厯重巽申

嚴恨不躬親矢石顧忠憤雖切事不從心
致安攘無裨衰且多病賜之骸骨竊感大
造曲全老去林泉惟冀苟延餘息何意優
獎海洋之斬獲檠頌殊異之 恩榮分內
帑之竒琛 先生委礫蠲 上方之組麗
賁及初衣尺寸未酬祇驚惶於綸綍毫釐
莫效自弃絕於陶鎔 臣敢不藏為世珍服
之無斃俯礪益堅之志仰祝垂裳之休伏
願 聲教迄九圍北虜南夷咸歸玉帛

武陵先百粵漁鯨獵獍蚤偃鉦輦

恭謝 欽賞疏

伏念臣材本駑下行復迂踈勉任馳驅徒
懷犬馬之志久糜祿秩未酬秦養之恩
伊嶺表本山海之區藉險地為逋逃之藪
若廣州之新寧新會林茂密而結寨幽深
在高州曰恩平陽江逕崎嶇而嘯聚繁夥
頻年標掠四野靡寧闔境憂危茲辰正劇
致貽憂於 宵旰勞成算於巖廊授鉞得

人憚慳決三軍之勝出師以律貔貅宣九
伐之威狐豕潛踪已全消乎靈疇旄倪有
望感慰滿於雲霓豈商宗鬼方之誅猶需
三歲比虞帝有苗之格無俟七旬寰宇廓
清神人憚豫寔由我

皇上洪鈞陶鑄鼓元氣而六合從風大造度施
握真符而百靈受職是使懷忠抱義共殫
力以宣猷蠢彼負固怙終宜禽薊而草薶
在將士不得貪為己力於微臣何敢濫與

前功乃荷慈仁不遺罪譴出兼金於內帑
中重異於私居自慙頑鈍之材敢忘磨礪
勉篤堅貞之節矢效分毫制器傳家珍重
恩私世世鐫銘頌 聖榆揚武烈巍巍

再撫陝西謝 恩疏

伏念臣迂愚無識疎淺多愆奔馳積有歲
年曾無建立志意猶存報效不任疋疲素
隴盤桓虛糜俸給部寺更歷濫竊 寵榮
繼監消淮甸之間僅免廢事復視師嶺海

之外迄無成功勞瘁憂惶侵尋衰病駑怯
自干公議生還寔荷 明恩一解戎衣又
安初服緬懷 高厚祗履祝頌於無忘退
省孤寒已踰分量而莫稱絕無希冀誤辱
甄收本以枯荑重霑惠露豈其老馬敢望
長途矧西陲當蕃虜之衝安攘攸寄而憲
府為紀綱之地振肅尤難 臣敢不益懋脩
持勉終晚節矢殫心力仰荅 弘庥息烽
火於三邊共荷

皇威讐服蘓困窮於八屬期臻 聖澤滂洋

謝賞疏

隆慶六年正月初五日准兵部咨為恭報
原議增修極衝邊垣墩堡工完等事該本
部復議裴家川邊牆墩堡既經修築完備
先後效勞各官相應通行賞賚等因具題
節奉

聖旨

賞張瀚銀二十兩一表襲欽此欽遵備

咨前來隨於本年二月二十四日該承差

田濟國齋捧 欽賞銀兩表裏到 臣當即

焚香望闕叩頭祇領外伏念臣謏蒙

簡命再撫西秦當入關之初適興工之際乘虜
酋臣服之間用士卒版築之勞曾不踰時
遂成永利皆仰仗

皇上威稜震龍言近悅遠綏故臣庶宣力協謀不
疾而速也 臣何功績敢辱 恩頒有隕自

天措躬無地敢不堅貞自礪佩服無忘誓效緘

埃仰酬 高厚

南京掌院謝恩疏

臣原任兵部左侍郎巡撫陝西隆慶六年
二月初一日該吏部等衙門會推具題奉
聖旨張瀚陞南京都察院右都御史念臣行本
迂愚才尤譾劣久糜廩祿未效涓埃關隴
方懼曠瘵留臺遽膺簡擢感逾涯分心
切戰兢臣敢不益勵寸衷勉終晚節誓殫
駑力仰荅鴻私

南京工部謝恩疏

臣原任南京都察院右都御史隆慶六年
七月十八日該吏部會題奉

聖旨是張瀚陞南京工部尚書除望 闕謝

恩於八月二十二日到任管事外伏念六曹清

峻之階惟賢是擇八座班僚之剋非德弗

居宜需隆棟之材庶稱曳履之選雖舊都

事簡而名秩不殊迺 明命荐加致戰兢

無措謝疆場於西鄙方覩厠乎臺端荷綸

綍於 北辰遽晉司乎邦土例不敢為辭

讓祇厯狗馬之心志不懈於衰遲永矢羔
羊之節

再謝 欽賞疏

竊念西省本 國家藩籬戍守出累朝建
置虜情叵測漸黠驚而難馴兵制徒嚴愈
繁冗而多費頃緣投欵幸息遙塵烽火不
驚士馬畜銳除戎設戒 綸音每思患預
防振旅宣威諸鎮敢忘危弛備故勞版築
習戰守既不致恬於軍需而節浮靡謹征

輸時復申嚴於查覈以是隨在劑量較前
稍有贏餘非能頓革故常矯飾以干譽聞
豈意 聖明垂照遠及纖微至蒙 大賚
均施仰承蕃錫光分內帑出羨鏐於朱提
綵綯儒紳煥班文於錦里 恩私同覆被
忍忘絲縷服勤銘刻屬精堅終藉陶鎔在治
乞恩移贈疏

頃者恭遇

皇上俯從禮官之請冊立

皇太子正位東宮 盛典既成 綸言覃布爰

推 恩以廣愛亦布 德而施生

誥勅均頒 仁孝淪浹寵錫庶子嗣續光榮普

天率土莫不歡欣踴躍臣至微且陋濫辱

弘庥感激屏營未能圖報豈敢他有希冀竊懷

區區迫切之私旦夕展轉不能自己乃敢

開具情實 上陳過恃 天恩浩蕩布獲

滲漉纖細無遺而臣所懇旬實亦 明詔

之所該載也 臣伏讀 詔書一款兩京文

官一品至九品各給與應得誥勅先已給
領者與進本品勲階一等如品同而職銜
不同照見任改給有願移封移贈者聽若
先已移封移贈今與本身及妻誥勅欽此
臣今任兵部左侍郎叻忝京官三品臣父
祖本身及妻皆在應給 誥命之列緣臣
先任總督漕運恭逢

皇上即位覃恩前項 恩典已該吏部題請准
給臣有應進勲階亦不敢領獨念 臣有本

生之祖張綬實生臣父應祿臣祖紀以同
母弟立父為後臣自有生以及弱冠均受
二祖教育之恩二十年臣祖之歿也歎曰
惜哉一孝子臣父時時語臣輒歎歎泣
數行下今臣幸出非望父祖皆荷

龍章光被丘壟而臣本生之祖獨不獲霑一命
竊恐臣父之心必不安於地下臣今不能
繼志是忘本不孝罪無所逃異日何以見
臣父於冥冥少慰歎歎無已之念耶臣前

次奉 詔即欲請乞移贈因未查有移贈
及祖之例不敢輕瀆臣昨行經江西萬安
訪聞工部尚書朱衡先任吏部右侍郎時
曾將伊祖寵與本生祖憲具本陳乞蒙准
皆得 詔贈今臣事體實與相同且臣前
次 詔命俱未給領願移臣與妻應得之
封移贈臣祖及祖母林氏臣不勝受
恩感激伏乞 勅下吏部查議施行則枯朽
有知應卹結於寔宓衰庸未隕矢殫力於

涓埃

乞休疏一

伏念臣本行能鄙薄仰荷 國恩祿食垂
三十年未效涓埃之報向雖抱疾不敢顧
恤已私干瀆 天聽頃因被論臣時宿疾
正發倉卒迴避待罪行至華州積勞傷心
胸次鬱懣一時下血數升自此氣體頓衰
藥石無效與疾就醫自分踈庸無狀又宜
擯斥又經言官指摘益知罪不可逭沿途

恭候 明命間續得邸報該吏部查訪生
平傳及輿論仰體

皇上愛惜人才至意議覆上 請節奉

聖旨張瀚准留用 臣聞 命自天不勝感泣踈

逖小臣豈有寸長片善仰荷

聖恩天高地厚如此誓當粉身碎骨猶懼無以
報稱萬分之一豈敢他辭但臣稟質素弱
多病早衰連年奔走闕蜀秦晉之間辛苦
迨遭精力疲憊目昏頭眩痰嗽怔忡今復

傷耗心血形銷氣短若復隱護就列則病
日益深瘵曠日甚事上之義守身之哲將
盡失之犬馬私忱切有所未安也伏望

皇上憐臣砥礪苦心察臣蹇難病體乞 勅吏
部容臣致仕倘幸苟延殘喘前疾少蘓日
惟引領北辰祝延

萬壽生當歌咏太平歿亦結草泉壤矣

乞休疏二

臣先因患病具本奏乞休致一面與病就

醫恭候 明命問欽奉

聖旨吏部知道該吏部看得臣才猷揮霍操履
謹嚴剔歷有年聞望素著况際清明之會
又逢知遇之恩正宜竭忠圖報豈可遽爾
乞休雖稱患病料非沉疴不妨在任調理
將原詞立案仍轉行陝西撫按衙門行臣

照舊供職尋蒙

聖恩又叨左使之轉伏念

臣草茅微賤遭際

聖恩掛籍仕版三十年服役內外十三任未有

功能表見僅僅兢惕自持隨在勉供一職
仰慙鴻造下負生平况臣近奉留用轉
官渥恩感激思奮尤非尋常可比豈敢愛
惜狗馬之生甘同草木之朽自棄於

天高地厚之外玆寔緣舊疾未愈新疾復增
往時痰嗽怔忡遇勞始發邇來時時咳嗽
涎唾不止中心搖搖晝夜不息加以虛癢
夜熱憔悴骨立若非謝事靜養必無可生
之理仰惟

皇上容留冗賤無非責以宣力效勞少裨化理
今臣病已數月日益增劇即此身尚不可
保豈能勉力奮起效涓埃之報仰答明

恩於萬一耶是敢披瀝悃誠再疏哀懇伏望

皇上憐察苦切真情勅下吏部將臣放歸田

里使得幽棲靜攝專心醫療倘幸漸減宿
疴則餘生出於非望縱使化為異物亦素
願足於首丘皆

聖皇體臣育物之仁如天好生之澤臣敢不誓

對結以延感激之忱也

乞休致以謝人言疏

臣原籍浙江仁和縣人由進士蚤叨祿食
服役內外三十餘年所至治行士民公論
不昧故雖遭讒構陷私惡不勝公好本年
五月內以陝西左布政使歷俸幾及三年
伏蒙 簡授都察院右副都御史巡撫陝
西地方交代後即出固原防秋仰仗

聖皇威德一鎮無警事竣還省十月初八日於

涇州得報蒙改大理寺卿臣孤蹤賤士存荷
聖恩天高地厚犬馬有知猶知報主臣獨何心
敢不殫忠竭力誓效涓埃是以身雖夙嬰
辱弱不敢遽有陳乞實懷感激砥礪之心
甚於畎畝桑榆之戀也頃得邸報該御史
論臣不職大畧謂臣以虛譽倖進不當
叨冒崇秩欲將臣罷黜或令致仕或以方
面改調止為臣曾被論列附和一毀之言
意在擠排無他指端臣不必辯平生委未

識面亦無私讐止緣河東交代之日適臣
遠在固原相離千五百里通問不先河南
山西則皆近而易達以彼相形遂見憎憾
况二人同年同官應相昵厚小釁致嫉黨
同求勝宜不免矣臣何敢辯但臣德薄才
庸蹇命多疾年逾五十精力已衰經畧安
攘既無揮霍之能斷獄平刑終鮮明允之
見本皆重任委不能堪彼意雖私其言良
是且臣屢疏乞休非敢矯飾其詞心懷貪

戀伏望

聖明憐察 勅下吏部始以所論中議容臣致
仕俯順言官之情亦以全臣終始之義平
生圖報未盡之忱惟竊伏林泉旦夕焚香祝
聖皇萬壽無疆萬邦寧謐歌咏太平以延餘生
不勝幸甚

衰病乞休疏

臣稟受薄弱少多疾病自入仕途歷官皆
冗劇之役心煩於慮身親其勞然猶奔走

多年苟延性命以至今日者以硜硜砥礪
志專報國升沉毀譽未戚戚揺惑其心由
副使至左布政使十餘年皆單騎往來無
情愁縈牽之累故雖屢抱危疾不即隕絕
今臣祿食凡三十有三年犬馬之齒幾六
十矣精神旣耗氣力已竭數月以來鬚髮
盡白銷振奮之志增委靡之慙昨在淮揚
衝繁覺不能稱思欲乞身適奉兩廣之

命時事多艱

臣受

國厚恩豈敢避難

歲暮亟

趨交代冀收戡定之功少效涓埃之報不
意事與願違病緣勞積時下痰喘怔忡耳
鳴目眊稍履思慮輒眩暈倒地至不能應
對者累日矧瘴厲之地寒暑難調病臥呻
吟醫藥罔效自治不暇竟復能足勉督率
任軍旅之事底蕩平之績乎鯨鯢在海臣
矢心殄滅豈恤微軀顧定策憚幄鼓舜將
士計議糧餉申嚴號令皆精神心力運用
當茲擾攘雖壯盛魁傑尚恐未能猝効可

使孱憊之餘負重大之寄徒瘁其身無益
於事非 朝廷用人平定禍亂至意亦非

臣趨

命赴功感激圖報之初心也如蒙

皇上憐察將臣放歸田里使得就醫調攝別選
賢豪精銳以稱任使萬一苟延殘喘荷

聖皇再造

弘恩回生之年皆祝頌之日也

衰病乞休再疏

臣自夏月感冒煙嵐暑濕之氣觴發於積
勞虛弱之餘痰嗽怔忡頭目眩暈每屢思

慮輒昏迷倒地實不能勉強供職萬不得已具本於隆慶二年八月十三日差人陳奏遠隔萬里之外急切不得邸報驛站往返非三四月不能即回臣旦夕矯首北望惟願天恩早賜俞允得遂生還亦自多方醫療庶幾少瘳不意年齡既暮血氣有減無增沉痾已成藥石損多益少降火則脾胃受傷理肺則心腎愈怯素稟薄弱不耐銷磨元匪豐腴遂見骨立自度必難猝效必不能

復任勞役竊恐

聖明以兩廣重寄時當多事不可輕易部議又
或不知臣之疾劇不忍遽棄則臣孑然一
身侵尋瘴癘日深日迫既無望於生必更
速其斃腐朽微賤奚足憐惜徒令扶病不
足濟軍旅之艱委身無以益底定之績國
事臣情將兩失之即死有遺憾也是敢冒
昧披瀝再懇伏望

聖慈垂鑒姑容休致使得與疾故鄉就醫調治

苟延喘息別選賢能代臣振武備以奏膚
功則地方無誤事之虞狗馬感再生之惠
臣無任懇切哀鳴隕越待罪之至

應 詔自陳疏

臣伏讀

皇上登極之 詔內一款節開六部等衙門四
品以上官及各總督巡撫官俱着自陳去
留取自上裁欽此伏念 臣原籍浙江仁和
縣人由嘉靖十四年進士歷卽署邵守二

司右副都御史大理寺卿等官四十五年十一月內以刑部右侍郎陞今職又荷

恩榮深慙無補進登臺省益懼難勝惟茲淮揚為南北要區而漕運乃國家重計邇來弊增於積習之後政隳於姑息之餘軍衛有司人持異見兌運交納掛欠遲違兼以分布海防尚勞師旅餉兵無備民且阻饑外患未消內多鼠竊凡此裕國保民之務必資私毅明敏之才踈拙如臣委不能稱

况年已漸衰身嬰多疾勇於任怨而心氣
不足動輒健忘急於奉公而見事每忽因
之妨廢力小任重竊祿妨賢督撫之臣皆
當弃置宜莫有如臣者也伏乞

聖明將臣放歸田里別選賢能以代斯任則官
途無曠聖化維新重鎮得人庶務有賴夫

自陳疏

臣於隆慶三年二月二十七日得見邸報
該吏部覆題為遵舊例嚴考察以勵庶官

事節奉

聖旨四品以上聽補等項官依擬都着自陳欽
此查得先該吏部覆題為秋防事竣酌議
督撫諸臣以欽奉 明詔事節奉

聖旨張漸依擬回籍調用欽此欽遵候交代間
伏念臣賦質庸劣久玷冠裳行政迂愚素
無聲望曩歲

先帝拔臣冗賤廁於列卿之班繼蒙

陛下命臣拊循兼以軍旅之事 恩同高厚未

效涓埃又以兩廣頻年多盜山徭海寇平
定無謀西省兩有芟夷負固不能殄滅潮
陽雖經斬獲黠酋猶未蕩平徒貽瘵曠之
譏寔負安攘之責况年既衰頹病尤沉痼
圖報徒切筋力已罷累罪積愆豈勝跼踖
向乞骸骨誠恐病癘日深隕首不足以贖
繼而兵科酌議之疏銓曹調用之擬實皆
憐察曲全之意復荷 恩慈俞允犬馬餘
生實同再造然已息心獻畝無復希冀茲

者適遇考察奉有前旨臣內自省訟歉
然懷慙措枉黜幽臣宜首及伏望

皇上將臣特賜罷斥或俯念積勞容令致仕
則臣殘喘未盡之日皆感激祝頌之辰也

自陳疏

准南京吏部咨該吏部節奉

聖諭朕初嗣大位簡汰衆職圖新治理兩京六
部等衙門四品以上官俱著自陳去留取
旨上裁五品以下文職兩京吏部都察

院會同考察欽遵備咨到院除將南京五
品以下文職官會同考察具奏外念臣
稟賦疎庸行能鈍拙累年叨忝未效涓埃
曩因兩粵放還久其棄置繼值三秦報缺
復奉甄收卅試州循迄無經畧猥蒙簡授
風紀專司官本清嚴兢惕難稱矧

聖化維新之會正擇人圖治之時顧茲任重望
輕職鰥貽誚又以衰年多病驅策不前循
省生平首宜汰黜伏乞

皇上將臣放歸田里別選才德以克任使庶以
迨臣愚竊位妨賢之罪益彰

聖皇明哲作人之功矣

臺省號獨卷之五